

AR SONER

11

son ar paour kaez miliner

◀ GAVOTENN AR MENEZ ▶

♩. 140

kan: Ken trist eo ma fla-ne-denn ma z'on skulz o oue-lañ.

diskan: Ken trist eo ma fla-ne-denn ma z'on skulz o oue-lañ.

kan: E - kreiz ma bra-sañ an-ken . tra-la-la-la-la-no !

diskan: E - kreiz ma bra-sañ an-ken n'om la-kan da ga-nañ .

Ken trist eo ma flanedenn ma z'on skulz o ouelañ
E-kreiz ma brasañ anken n'om lakan da ganañ.

'vit ma c'hellin bihanaat eun tamm va foan-spered,
O kontañ deoc'h ma c'hlemmou, tud yaouank selaouet.

Me 'zo eur miliner paour hi 'zo merc'h tiegez ;
Goude bezañ he c'harout me 'zo karet ivez.

Evel n'en doa etrezomp nemet eur park hepken,
Vezomp bepred assamblez, o c'hoari, o pourmen.

O tañsal oc'h ébatal hep kontañ ar buzul,
Er c'hatekiz a-wechou, an oferenn ar zul.

An dud o deus omp gwelet lavarent etrezo :
Rankjomp bezañ breur ha c'hoar pa n'omp c'heuilhomp atao.

Hor bugaleaj eürus pell 'zo oa tremenet.
Hag araok ar Pask kentañ ni 'oa dispartiet.

Hi 'oa kaset da Vrieg, lakaet en pañsion,
Mont a ran-me gant ma zud en tu all ar c'hanton.

Ma zad o vezañ merour feurm' eur vilin nevez,
Ret a oa din labourat, treki krenn ar vuhez.

Deski lemm ar vilin, ober paotr-miliner,
Digeri dor ar sklujou ha pep tra en eur ger.

Met dont a reas ar poent da vont er maez ar Vro,
Biskoaz diouz ma c'hoar vihan n'am boa klevet kelo (1).

Diouz he c'herent kennebeut n' klevan mui kaozeal,
Hep na c'hellis koulskoude donet da zisoñjal.

Echu ma zri vloaz servij da viz eost diwezañ,
Digouezet e-ti va zud, laouen en eur ganañ.

'vel eul labousig yaouank dieub e ziou askell,
O tont er-maez e gaoued a gan hag a nij pell :

Me o vont prestik goude de welout va c'herent,
Tisroiz diwar ma hent, hep digarez ebet.

Evel ma vijen poulzet da dremen dre ar gêr,
E-lec'h m'am boa tremenet gwechall eürus amzer.

Neuze edeg o torna, o tastum an ed-du,
Yudal 'rae an dornerez prez a oa e pep tu.

Ha ma mestrézig ivez a oa prez a warni,
Kement a ma piklamme o tostaat ouz an ti.

- • Demat ! deoc'h-c'houi Franseza, mat a bepred ganit ? •
- • O, ya, ma a koulz ganeoc'h, den yaouank azezit. •
- • Gant plijadur azezan daoust a ne n'ont ket skuiz,
• Tri dervez (2) on en distro diouz a-gostez Pariz.
- Ha benn eur sunvez amañ a vo pevarzek vloaz,
• Oan azezet 'n ho kichen 'vit ar wech diwezañ ;
- Souezet on az kwelet koulskoude sonj a rin,
• Ne fazifen d'az kemer 'vit Laouig ar vilin,
- Touzet 'c'h eus da vleo melen, kosaet eo da vouez,
• Met da c'hoarz ha da spered 'zo bepred ar memez. •

A-benn eiz dé goude-zé ni 'oa aet da Vrieg,
Hag erruet 'barz en kêr ez omp bet melkoniek,

Araok n'omp dispartial ni hon eus lavaret
An eil d'egile 'vijemp dive'toc'h (3) daou bried.

Aet a oan da he c'houlenn bremañ a zo eur miz,
Digant he zad hag e mamm evel ma z'eo ar c'hiz.

Met i roent din da c'hout (4) n'oant ket diouz o zoare.
Rak Franseza 'n devo ket an hini a garfe.

Me garfe n'am bije biskoaz klevet ar c'homzou-se
Pere a goueze warnon evel taoliou kleze.

Goude bezañ he c'harout, bezañ karet ganti,
O pebez displijadur, o tristañ disparti !

Klevout a ris lavarout 'oa vont da zimezi
Pa vab eun den pinvidik ker ouz ker diouti.

Nag an arc'hant milliget, tri pe pevar gant skoed,
'vir ouzomp bezañ eürus, ha bezañ assamblet.

Seblant a ra din gwelout atao o c'huanad,
Hag ar skeudenn anezi dirak ma daoulagad.

Ya, me 'garje, zur, bezañ ar maen war behini
A laka he zroadig skañv o tremen dre ar pri ;

Pe ar bokedig melen 'zo e korn ar bleuñveg,
'He dije en dastumet 'vit lakaat 'n he bruched.

Goude bezañ he c'harout, bezañ karet ganti,
O pebez displijadur, o tristañ disparti.

(1) Kelo = kaelou. (2) Dervez, pe devez. (3) Diwezatoc'h
(4) C'houzout.